

四庫全書

集部

欽定四庫全書

集部
香溪集
總目
卷二

詳校官起居注主事_臣顧宗泰

主事_臣呂雲棟覆勘

覆校官中書_臣汪師曾

校對官中書_臣潘庭筠

謄錄監生_臣張德燾

欽定四庫全書

集部四

香溪集總目

別集類三 宋

卷一

古賦

卷二

詩上

卷三

詩中

卷四

詩下

卷五

雜著上

卷六

雜著下

卷七

論上

卷八

論中

卷九

論下

卷十

書總論

卷十一

進策一

卷十二

進策二

卷十三

進策三

卷十四

進策四

卷十五

進策五

卷十六

記上

卷十七

記下

卷十八

書上

卷十九

書下

卷二十

啓

卷二十一

傳

卷二十二

墓誌

祭文

臣等謹案香溪集二十二卷宋范浚撰浚字

茂明蘭溪人紹興中舉賢良方正以秦檜柄
政辭不赴然浚雖不仕實非無意於當世者
其書曹叅傳後則隱戒於熙寧之變法其忠
臣翟義傳則深愧夫靖康之事警其讀周禮
一篇則亦為王安石發而進策五卷於當時
之務尤言之鑿鑿非迂儒不達時變者也其
詩論戒穿鑿易論鄙象數皆為當時學者而
言春秋論欲廢三傳則猶孫復劉敞之餘習

然盧仝所注儒者罕傳浚論尚載其數條亦足資異聞其辨孟母無三遷事黃帝無阪泉事周穆王無西至崑崙事雖頗失之固然皆於理無害其詩凡三卷近體流易猶守元祐舊格不涉江西宗派古體頗道亦非語錄為詩之比是集為其門人高梅所編其姪端臣刊之前有紹興三十一年陳巖肖序後有元吳師道跋稱朱子取其心箴注孟子而其集

金履祥時已不傳後從應氏得其前七卷又
從其族孫浚家得殘本佚前五卷合之遂為
完書跋又稱端臣蒙齋集未及刊先刊其與
浚唱酬諸詩附見焉此本無端臣詩蓋已佚
矣乾隆四十二年三月恭校上

總纂官臣紀昀臣陸錫熊臣孫士毅

總校官臣陸費墀

香溪集原序

士以志道為先而志道以養氣為本氣全則道存氣喪則道亡故達而在上任天下之重安國家利社稷進賢退不肖收功於無窮者氣也窮而在下守聖賢之道擁古今明治忽是而是而非非立言於不朽者亦氣也苟氣之不養則達而在上或充詘於富貴以得失為患則道不行矣窮而在下或隕穫於貧賤以紛華為悅則道不守矣不守不行氣喪而道亡則烏能收功無窮立言不

朽哉是則氣之在人窮則獨善其身達則兼善天下舉不可以不養也吾之先友香溪先生以養氣為本而立言不朽者與先生居香溪之上自少至老篤學而瞻於文探道而不以世故嬰其慮其家世父祖為名鄉賢刺史昆弟多居職仕而先生了無仕進意今天子即位之初詔復制舉以來天下之士當時公卿有以先生應詔者先生力辭之余嘗過香溪之上而訪先生焉先生危坐一室塵埃棲戶牖而凝几席敗帷故器人所不堪而

先生貌充體胖神宇泰然其言經術如親得聖人而授其旨其論古成敗事如目擊而身履之已而出示所為文則辯博而峻整正與向所言論者相表裏終日與之坐而無一語及世間事此非志於道而全其氣者能若是乎是日先生謂余曰是間山水清遠子能卜居以從吾游乎余方累於世故從官遠方漂流異鄉及歸而先生歿已十年方悼若人之不淑而吾無與居也一日先生猶子元卿過余曰叔父平昔為文至多今不欲秘於

家而出與世共之力有未辦則先刻其詩賦論議雜著
為二十二卷行於時子嘗與叔父厚願叙以冠其首嗟
夫昔鹿門子著書而自叙之曰醉士隱於鹿門不醉則
游不游則息息於道思其所未至息於文慙其所未周
古聖王旌山夫谷民之善者意在斯乎今先生不醉不
游直息於道而寓之文耳平時不以外慕累其心若求
旌於時亦豈先生著書立言之本意哉故述其志道養
氣之實以見素所蘊云先生姓范氏名浚字茂明而元

卿名端臣今亦以文知名方有志於世者紹興三十一年四月十三日同郡陳巖肖叙

--	--	--	--	--	--	--	--

欽定四庫全書

香溪集卷一

宋 范浚 撰

賦八首

姑蘇臺賦

述嚴賦

過莊賦

登八詠樓賦

慎術賦

金瓶梅詞話卷一
猩猩賦

甘菊賦

獬賦

姑蘇臺賦

辛丑年作

歲崢嶸其聿適兮冬隆寒老訪蘇臺之遺址兮遵吳都
之古道日下平林煙橫衰草慨傷時而感往增予心之
惓惓念昔吳王盤游怠荒次陂池兮臺榭宿嬪妃兮御
嬌雖生人已困於賴尾而土木之工未央於是越人仇

之冬冰是棲蠹也決策種焉建奇蓋君臣鳴鐘而謀于
漸臺者窮日夜而吳初不知種有七術越行其三取文
梓梗楠以奉吳王之宮室吳乃營茲榮臺歷三年兮聚
材斧集刃兮疊雪杵攢林兮殷雷金碧塗櫟琳珉城階
巖巍兮峽峴干霄兮切霓佩長洲兮茂苑帶潮汐兮濬
池意將遠眺數百里而下窺雲海之涯當其虐用吾民
骸臚莽暴蒲木切天厭其酷故啓越之謀而夜生神木人
罹其毒故勞愁慘悽而塗嗟巷哭使臺土未乾兮已群

游乎麋鹿至若朝歌淫淫夕管惜惜因醪醴之酣沈則
有西施蠱其心是助越人之侵又若姦讒回惑膏唇鼓
舌吠正人而媒孽則有宰嚭間其說是誨越人之伐嗟
乎吳王知西施之姝而不知宰嚭之諛知歌管之娛而
不知吳民之痛知華其居而不知其國之墟知勾踐之
爲奴而不知身之爲獨夫信茲臺也實亡吳之權輿吁

述嚴賦

并序

後嚴子陵十有餘歲蘭溪范浚過祠下仰瞻遺像惕

焉景慕謂先生之不屈于建武非若踰垣閉關為已
甚者揆其意而著之作述嚴賦

歲辛丑予東歸兮凌濤江之渺瀰引帆席而朝發兮夕
予次乎嚴君之祠惕仰高其若存兮揆厥意而明之曰
先生之遭世兮會炎正之中微慘餘分之孽虐兮方悖
道而窮威率誅忠而任殘兮紛赤車之四馳蕩三綱其
弛絕兮誰不裂冠而去之宜先生之高蹈兮靜游釣於
淪漪逮赤伏之膺運兮矯白水之龍飛彼群雄之䟽附

兮猶響臻而應期何故人之雅素兮飜固拒而牢辭惟
先生之高介兮氣干霄而上躋耻一毫之或挫兮若撻
市之忸怩彼君房獨何人兮將使我自屈而詭隨荃不
察予之口授兮顧狂奴之是譏視蒲車之來思兮類被
毀而遭非謬儒仲之耿耿兮繫俗黨之貽訾伯兄願修
於初服兮幾偃蹇而見擠旣讒巧之孔多兮予又胡為
乎遭迴寧超超以遐逝兮亦安能依世而突梯意先生
之達識兮不降志其由茲吁嗟器大時難容兮追巢躡

由邈儷蹤兮水之渾渾山崇崇兮遺芳不泯名益隆兮
何千萬年激頽風兮死者如可作惟先生之宗兮

過莊賦

并序

莊生有言大塊載我以形勞我以生佚我以老息我
以死世誦其說予獨以為妄辯作過莊賦

大塊載我以形稟我以性目吾使之視耳吾使之聽言
以抒吾意思以達吾惜我飢我渴與以飲食我作我息
詔以晨暝使我從容乎事物之間而不失其正天於人

爲至厚稽諸身而可證何生之勞可爲吾病何必老而後佚何必死而後靜苟達觀於一致何存亡之足評豈有身則爲患豈身殞則爲勝顧真我之爲我匪形生而氣孕曾無象以獨立緊常存而靡竟歷千變與萬化每自如而安定彼從壯而得老此何衰而何盛彼從老而得死此何損而何賸鑿至理而妄辯實莊生之未聖若予者則爲如何邈與世其無競蓬茅一室松菊三徑林嶺泉石娛吾游衍風花雲月供吾嘯詠無營無欲爰清

爰靜隨所適而得此生焉聊樂乎天命

登八詠樓賦

憑軒楹而寓目納萬景於遐荒窮煙鴻之滅沒辨雲樹之微茫群峰屹乎延連兮疑結根於台嶽兩溪浩乎奔渾兮將走集於濤江俯萬落與千村鬱春靄之蒼蒼林廬隱映乎郊郭錯彩翠而相望繚叢城之綿聯帶碧水之灣汪搖晴陽而蕩漾射藻井而交光攬山川之壯麗睨棟宇而相羊信茲樓之奇觀甲區中而少雙山川兮

如昨棟宇兮非昔閱古今於百代忽白駒之過隙引玄
酒之一酌弔隱侯之幽魄想悲桐而憫草悵多違而撫
臆豈當時之擯落亦擁節於侯國顧人壽之幾何胡不
怡而慘戚慕太白之來游嘗坦腹而高眠雖身世之爛
漫獨訪古而留連誇魏萬之經行邈曠望乎群川流宕
崑之逸句凜生氣於千年吁嗟乎懷古人兮眇眇倚飛
欄而吟嘯惜此地之勝賞復徘徊而臨眺見漁子之浮
舟正擘餌以投釣凌驚波之洶涌方危坐而獨笑見田

翁之引犢出城陰之落照雖市聲之合雜獨行歌而荷篠悟物理之一致得領略於無言苟吾心其專靜豈世故之能遷彼沈郎之煩促真膏火之自煎信謫仙之曠達脫世故之拘攣試寂默以冥觀泯萬慮於自然

慎術賦

人孰不良惟術也利人之傷則為豺為狼人孰不令惟術也刼其正性則為梟為獍彼市矢工懼羽鏃無庸幸仇敵之交攻彼鬻棺子懼禪旁積委異市人之立死歲

或大飢足穀者男歡而女怡蠶不三俯績帛者朝歌而
暮舞癘疫興而國工捧腹雩禱用而淫巫布武推類以
言事胡不然習武者思亂好夸者盜權爭名者不得不
賣友以自遂爭利者不得不排人而取先聚歛用則不
得不爲桑羊爲孔僅法律進則不得不爲張湯爲臧宣
子貢不得不亂五國以納說蘇秦不得不聞七雄而合
連故曰術不可不慎也爾其戒旃

猩猩賦

以爲援而語惠以爲人而意愚嗜屐嗜酒以亡厥軀終
雖亡軀猶戒其初彼世之溺名淫利而不知省者初寧
戒乎噫猩猩之不如

甘菊賦

爾英之可藥兮將使人壽而不死因見髡于朱孺子爾
華之可蔬兮將使人飢而得羹因見戮于天隨生旣髡
旣戮根莖瘁禿爾曾不如不材之木大爲槃癭細爲卷
曲永無濟世拯人之用兮迄天年於窮谷

蠲賦

橫行蠹稻雄稱鬪虎貪恠無厭平化作田鼠吾將斫爾
螯折爾股以除農殃兮酣我醕

欽定四庫全書

香溪集卷二

宋 范浚 撰

詩

雜興五首

遣興五首

題八馬圖

寄謝潘舍人贈烏紗帽

遊蘭溪靈洞

題茂通弟斗齋

寄題錢伯茂遙碧軒

寄題何元晉亦樂堂

送春曲

春融融效李長吉體

同伯通端杲姪效盧仝體

同茂通弟效溫飛卿體

送喬民瞻倅武昌

送徐履之倅南昌

六笑

讀揚子雲傳

讀王建射虎行

冬夜有感

送茂瞻兄機宜之官廣東

贈青城道人

理喻二首

雜興四首

聽琴

寓寶惠寺喜晴登山

次韻端方姪過予偕行南村翫月

送茂安兄知縣之任永嘉

次韻端臣姪雨晴出郊

送袁上人還銅山

雜興五首

雉驕有擅澤雞雄亦專栖乘人肆桀傲未異雉與鷄虛
張盡客氣不知墮危機雉驕或登俎鷄雄亦為犧嗟爾
桀傲子不戒將安之

荆梟昔見惡去楚將巢吳妖音不知革吳豈荆人殊梟
能戒頰舌勿復輕嗚呼雖荆亦容尔何必他邦居

高蟬蔭嘉木未省蟬斧危勇蟲亦何愚不顧黃雀飢癡
癡挾彈子已復露霑衣世事無不然古今同一悲

鵲噪得歡喜烏鳴得憎嗔烏鵲自有口噪鳴何預人烏

飛聲啞啞鵲飛聲嘖嘖九鳥從紛紛未用置肝腸

彭亨着冠猪踉蹌上車鶴皇家一清明此輩東高閣龍
夔雜鵷鷺庶位已參錯少安真可待四海得耕鑿我亦
幸豐年從容一邱壑

遣興五首

商山園綺徒雪髮映松露山間謂終老不踏市朝路一
朝前星匿羽翼起調護婆娑古衣冠笑定國儲副留侯
計偶爾昌遽動貞素因知古今士出處自冥數功名苟

不免四老猶一助寧庸巧馳驅失尔邯鄲步

少陵古詩伯未必真豪人胡為冷炙辱自分潜悲辛莫倚善題賦未悟嚴武嗔徒言磊落士不肯異其身

我逢劉潁川竟夕不向枕餘人偶對面白晝輒欲寢生來不耐俗敢妄作題品猶嫌太分明客至姑與飲

龐眉困郎署白首命不遭猿臂無侯封徒負射虎豪兩者阨天運材智俱莫逃向來鄧氏子志行劣可褒藉非逢際會未免掾功曹

翻雲覆忽雨昨火今已永三塗九州險未似今人情人
言餘耳事令我不忍聽嗟哉泝水上刎頸遂寒盟

題八馬圖

何年畫工搦毛錐貌此八馬姿權奇青絲絡頭十二蹄
調柔意態行愉怡五馬放浪無維羈或齧或望仍迴嘶
一牧牽轡一牧騎製度髣髴唐巾衣不知此馬生何時
昔周穆王遠遊嬉駕跨八駿驅東西高升崑崙躡瑤池
騶駼驥義勞馳日走萬里無停驂興元唐家危累基

百弩僅脫朱泚圍黃屋進狩懷光追八馬入谷七馬疲
筋攣肉綻行人悲兩者資世皆顛羸虛名何有千載垂
空得傳記流歌詩未如此馬閑猶夷牧垆不受鞭箠威
不踣險遠安無危泉甘草薦足自肥安用號駿稱雲騅
嗟哉畫意誰能知

寄謝潘舍人贈烏紗帽

野人儀矩初無華况復破帽風簷斜先生有意念衰醜
折簡遠送新烏紗束巾試著出妨戶色若露洗凌晨鷄

金剛四庫全書
卷二
舍人樣好信殊俗朽質得此慚無涯白癡稚子強解事
競道宜稱相謹譁輕寬不但愜當暑掉頭曝背仍堪誇
修容他日奉遊宴便可笑誚叅軍嘉從今旦暮戴公賜
閉關無事聊煎茶

遊蘭溪靈洞

朝曦杲晴空宿霧開紛披紫紆度壚曲輦确行溪湄橫
橋轉山腰丹堊明招提豁訝覩陰洞欲入愁途迷流泉
暗淙琤噴壑跳珠璣巖根石彩翠映水光參差窮高上

蒼岑支策行歌危林端出紺宇兀與浮雲齊曾來念舊
事歷歷經行時松長向如人今已老十圍我尚喜青鬢
還年未生絲偕遊數君子意擬探平聲幽竒諸峯未歷覽
寒日還平西同携下前麓却望蘭陰歸明年艷陽春更
約相追隨當須各努力補屐尋幽期

題茂通弟斗齋

昔人驕豪自髻髻萬里浪欲乘風破暮年志計轉難量
眼看一州如斗大今君容膝能自安高館不與身相關

作齋似斗意闊達宇量寧妨廣百間足明居世惟知足
寬窄在心非在屋莫言齋小礙人眉清絕坐銷愁萬斛
奉身那用有餘爲身穩心安君自知軟褥傍爐時枕肘
不須小帳更低垂

釋名小帳
曰斗帳

也知丈室含無際自有壺

公容客地斗齋我已戲題詩斗酒還當就君醉

寄題錢伯茂致政奉議遙碧軒

君不聞漢時遺榮兩大夫群公祖道傾京都去塵寂寞
絕繼踵但見畫手空傳圖君今心事能超古早束衣冠

掛神武掉頭不待迫懸車廣受視君知孰愈世人分著
金籠頭或貪微名魚中鉤寧如君脫宦海去飽看遙碧
臨清流似聞遠目增明處宛如畫出城南句款門何日
赴幽期坐挹雲岑爲君賦想當遐矚窮天垠吟憐修眉
濃綠新應嗤爭利推車客不惜青山碾作塵

寄題何元晉亦樂堂

士生墮塵網窘若囚飛虫思牽黃耳不可得况欲雲卧
聽松風何郎可憐人恥與俗同調不作窮愁懊惱詩獨

抱青山坐長嘯誅茅結屋傍林塘石蘭露菊秋風香掉
頭萬事一不顧仰天白眼傾壺觴邈予坐阻窺幽躅夢
到東牕攀綠玉裁詩寄似堂中人爲揩銀鈎寫高竹

送春曲

春光春光勸汝一盃酒我能爲春作高歌未解春能聽
歌否春歸有底急落盡桃花紅園蹊漠漠野陰靜兔葵
燕麥空搖風風光幾何時背我忽如客殘絲欲斷感春
心語燕勞勞上簾額我有惜芳意一春憐物華春來雪

裏索梅笑春去悵望飛楊花春歸知復來奈此經年別
搖揚三月暮天愁鷓鴣一聲芳草歇歌竟我亦醉一棹
舣舫空明年待春花樹下放歌擎酒相迎逢

春融融效李長吉體

天暄地媚春融融化工點染分花容東風夜半入香陌
雜樹曉繁爭白紅蘭叢蕙根芳翠滴柳豔明眉輕幕塵
紅顏綠鬢青春客壺中新醅鴨頭色殘絲冉惹愁如織
日暮低迷草萋碧

同伯通端杲姪效盧全體

一春癡癖門長扃兩耳不聞鶡鴒聲不知東南風掃盡
紅紫英行行點檢桃李徑但見樹子青冥冥門前水流
渠照灼須眉清科斗游其間脚股各已生渠旁草鬱鬱
草底蚯蚓鳴韻如抽繭絲幽咽得我聽念此瑣細物隨
時變音形黃河赤鯉或點額老驥塞默長羈縷嗟嗟世
路真難行

同茂通弟效溫飛卿體

海棠紅歇鶯停歌
麥風時候猶清和
簾垂翠窠深院靜
赤欄細柳陰婆娑
池塘正覺幽事好
萍葉藻蔓涵清波
一雙胡燕薇叢外
銜得芹泥來補窠

送喬民瞻倅武昌

春風未綠江南草
春信臘前梅蕊早
水村著處是南枝
想見君行被花惱
如君久合上華途
胡爲半刺猶題輿
奉引未騎沙苑馬
倅藩且食武昌魚
頻年欣接游從樂
忽手別書空作惡
江干跋馬望行艫
日暮山寒雲錯莫

往聞南紀百戰場腥風殺氣吹湖湘只今江漢俱練靜
棹謳雜發行連檣君從鸚鵡洲邊去歷歷遙看漢陽樹
莫言槌碎黃鶴樓準擬書來寄佳句

送徐履之倅南昌

春山罨畫春江平江頭春舡椎鼓聲鍾陵別乘喚帆席
笑看獵獵風搖旌明朝太末經行處懸愁望斷煙綿樹
勞勞檣燕亦留君且共推篷話情素鍾陵地雄古名都
美官況復稱題輿看君逸足展夷路逐電追風萬里餘

前知按部勞綏撫算篁行濕西山雨君家孺子有遺臺
試向東湖聊訊古蘭陰新漉酒吹醅更折江花勸引盃
聖代興廉訪良吏遲君却抱鶴書回

六笑

我笑支道林遠移買山書巢由古達士不聞買山居我
笑賀知章欲乞鑑湖水嚴陵釣清江何曾問天子我笑
陶靖節自祭真忘情胡爲托青鳥乃欲長年齡我笑王
無功琴外無所欲當其戀五斗乃獨不知足我笑杜子

美夙昔具扁舟老大意轉拙欲伴習池遊我笑韓退之
不取萬乘相三黜竟不去觸事得譏謗客言莫謾笑古
人笑人未必不受嗔螳螂襲蟬雀在後只恐有人還笑
君迴頭生愧不能語嘲評去聲從今吞不吐譽堯非桀亦
何爲訕周譏禹終無取

讀揚子雲傳

老不曉事揚子雲綴文譏訶堅逐貧班生曲筆甚假借
謂不戚戚元非真草玄欲作後人計投閣自迷身不利

王涯策中好其書寧復逆知甘露事
聽聲紫色欺昏童
義士遠引如冥鴻胡為顛眩尚執戟
美新屈首稱臣雄
岷山沃野蹲鴟大拓落不歸良已過
近危竟似井眉瓶
虛作反騷嗤楚些詭情懷祿遭嘲評
但用筆墨垂聲名
文章要亦千古事久矣法言今正行

讀王建射虎行

我讀射虎行感槩興長歎官差射虎得虎難
山下遠立
常空還惜留猛虎著山裏射殺顧恐終身閑
有如邊將

圖偷安遵養草竊容其姦翻愁努力盡高鳥良弓掛壁
無由彎君不見劉巨容高千里留毒自資媒富貴恐毒
去盡身不利坐令屈律畏頭人橫暴九州狂螫噬嗟嗟
忠臣心不移受刀摩頸甘如飴紛紛血刃勇不顧一死
未謝君王知官軍壯志同熊羆風煙不靖寧家為相公
誓欲平淮西慨言敵在歸無期霍公裴公今已矣我吟
射虎徒歔歔

冬夜有感

宵長倦觀書掩帙起微步徘徊簷隙月點綴竹梢露寒
空頑無風寂歷鴈時度不知何處村尚急野塘岸哀哉
當丙夜取水窮沮洳得無空魚群一舉不復顧那知今
竭澤無復魚可捕天公仁百物暴殄天所怒褰裳欲從
之告以盍長慮浮雲暗林野恐墮荆棘路出門還入門
此意定誰喻遣興強微吟淒涼不能句

送茂瞻兄機宜之官廣東

時年十七

黃蘆鬣鬣秋風腓鬼雨灑草南山悲長塗客子動愁肺

往往捫轍多思歸我兄豈不感時節東床卷席將何之
自言南州有元帥標鑒本是陽秋皮薦紳奔走欲定價
一見許我奇男兒提撕表奏置戎幕使我坐幄官機宜
高生所媿國士知不辭觸熱向武威我今去路雖千里
敢以驅馳負知己南州最盛肩京都惜別欲語停盃徐
地靈孕秀多異產鼉皮蚺膽如蟲蛆舊聞民俗蠻頑甚
蜂屯蟻雜難爬梳聖朝神化與換骨詎事草薶髡根株
我兄智囊載大腹撫俗自應才有餘霄間長劍生銅吼

可盡沙蟲快屠狗後當歸路持旌麾六印黃金大如斗
贈青城道人

道人來自青城巔飄飄逸氣凌雲烟青鞋布襪久遊世
踏盡海宇名山川琴心三疊得妙旨華頂一路通幽禪
自言早歲拾瑤草往往鶴上逢真仙惜哉食服只半劑
猶與人世相周旋曾期汗漫九垓外決去已復揮驟鞭
伊予此生一念誤遂墮塵網嗟拘攣鏡中華髮已踈索
肘後丹經猶棄捐三山銀闕渺何許悵望碧海波翻天

因君告我獨往意技癢竦踴心茫然莫言得道兩塵隔
蓬島只在拄杖前定知後會君刮眼看我玉鍊還頻年

理喻

郵亭羈客寒無氈夜懷家山情惘然燈前坐感雨蕭瑟
浩歎達曉愁無眠鄰翁不出蓬茨裏聽雨聽風心似水
黃昏鼻息已雷鳴往往簷喧不經耳愁霖一種聲紛紛
鄰翁不聞羈客聞是中轉物有妙理起予暗契瞿曇旨
我眠鼻息鄰家驚耳不自聞齶齶聲我耳忽鳴韻清磬

旁人對面那能聽耳鳴如心念鼻息如已過心念潛萌
衆莫知已過自迷人看破歷歷眼前皆要理舉世何人
無鼻耳

雜興四首

水母雖目蝦竟自了無覩如人心苟盲記誦亦何補當
須見精義一覽洞千古可效章句徒冥迷自聾聵
乞火固得火不如鑽燧多寄汲非無泉鑿井泉盈科君
子貴自得願豈求之他心焉有餘師柰彼自棄何

飢人嗜敗肉渴者甘腐漿一為飢渴害食飲俱失常況
茲方寸間邪欲紛難量微哉此心害禍甚飢渴傷

昔人稱水淫好潔若無奈居然一日間洗滌十餘過君
看七尺軀孰與此心大洗心儻亦爾會絕客塵浣

聽琴

坐人皆聽琴未必知琴音相知紛滿眼未必相知心知
音如子期知心如鮑叔此道久寥寥誰其踵高躅古聲
勿復彈古心徒自憐知音惟月露知我其惟天君不見

只今人情如紙薄，只今世路如溪惡。
咄嗟許事不足論，鳥跡微茫度寥廓。

寓居寶惠寺喜晴登山

喜霽出招提，愛山登業岌。
林端已殘照，路草猶半濕。
丹崖斷雲歸，翠窻飛泉入。
長天沒鳥影，遠水動虹吸。
塵襟得遐瞰，爽氣橫來集。
欲逐野僧還，更看空翠立。

次韻端方姪過予偕行南村翫月

焚魚共酌田家醴，歡酣述嘯涼風起。
子諳懶叔故相攜。

指點村南聊縱履行行
林影搖參差拄杖扶我長過眉
幽尋極眺不知倦路轉石角時
鉤衣泉聲入耳淙琤玉
何許泠泠砧杵續悠然發興見
南山林壑盤紆如岳麓
喧卑迥隔區中緣况復華月升
東邊明凝苔露正皎皎
淨映石瀨彌娟娟方欣清景多
幽事揚輝莫遣浮雲蔽
絕憐螢影巧自持却厭蛙謹苦
无謂歸來阿朗傍隅趨
示我長吟意有餘
明宵有月更相就
還看玉輪遊舞雲
送茂安兄知縣之任永嘉

不齊宰單父廩廩德垂久當年誠化洽誰忍輒欺負能
令夜漁人有得棄不取何因政乃爾賢助則多有東嘉
侔洛師雅號士淵藪儒風旣純古俗習自忠厚兄行試
牛刀豈復勞決剖鳴弦會多暇遇事无掣肘懸知著嘉
蹟遠與宓生偶匪謂得聲榮期兄富師友

次韻端臣姪雨晴出郊


雨中爛漫睡門徑橫林扉朝暉入甕牖起我聊伸眉良
遊眺江郊攬袂風披披平瀛漲新綠灑漾搖晴陂雲巒

靄空翠烟樹森華滋潭漁下罟罷隴種行樓犁食穿康
樂屐更杖原思恭阿宜倦遊還心事嗟多違新功在琢
句非復吳下時淵明賦歸來今是知昨非君看古賢達
茹草甘長飢悠悠身外事凜凜留中奇因康喜霽作用
代城南詩

送袁上人還銅山

上人眼睛黃游藝出天悟留中七曜歷掌上九籌數通
問諸百藥釀氣了三住餘猶窮衆術辨口劇河注誰云

不拘教心實謹律度提携木上座自足勤遠步丁丁啄
郊扉起我曳塵屨高談翠竹法時覓碧雲句語以丘軻
書竦踴知詠慕南山古花界可隱玄豹霧挽使小淹留
懷歸錫難駐長途雪沒脰栗烈正寒沍披披拂風袖笑
話巖中趣巾瓶到銅山鐘梵歲云暮浮雲亦何意南北
自來去遲爾青春深過予碧溪路



香溪集卷二

欽定四庫全書

集部

香溪集卷

三五

詳校官起居注主事_臣顧宗泰

主事_臣呂雲棟覆勘

覆校官中書_臣汪師曾

校對官中書_臣潘庭筠

謄錄監生_臣張德燭

謄錄監生_臣周元俾

欽定四庫全書

香溪集卷三

詩

寄題餘姚嚴公堂

歎旱

戲贈蜀僧清鑒

讀長門賦

上李舍人

宋 范浚 撰

送徐彥思倅建安

擬李太白笑矣乎

龍游吳宰因勸農過寓居

龍游王丞過寓居

四月一日偶成三絕句奉勉諸友

送李國佐還三衢

送趙安伯縣丞之任

凌霄花

題武康唐伯南掃月軒

寄題鄭亨仲可友亭

四睡

暮春病起絕句二首

浦江華藏寺如勝上人欲募施者開田佐僧供
以長老皎公書來求予詩作二十韻奉勉

郊行探春得梅林攀玩為樂因成詩示偕行

次韻樓仲輝郎中游天王寺登城晚歸三絕句

次韻端臣姪感興

次韻發守林懿成檢正游赤松絕句四首

次韻端臣姪喜雨

送別姚令聲刑定還諸暨

示姪

示友

送張子經撫幹還臨安幕

送葉彥益縣丞之任

對酒分和杜詩

游赤松觀

次韻茂通弟立春四首

贈清鑒上人

寄題趙叔才秀芝堂

苦寒行

淒涼行

三月二十六日夜同端臣端杲姪觀異書

四月十六日同弟姪敘李長吉體

偶作二首

狂泉

次韻茂永兄論有無之作

己巳十二月二十九日同端臣端杲姪觀王右軍

帖并晉書以白藕薦酒成詩

寄題餘姚嚴公堂

漢家蒲車邀客星嚴公高舉鴻冥冥故人作帝且不屈

肯復俯首趨群卿姚江知是公卿聚鄉人尚敬陳山墓

嚴公墓在餘姚縣陳山

寧須封鬣卧麒麟古隴荒涼名自著徐侯

健令聊弦歌草鞠犴圉庭張羅作堂縣圃得面勢正見
列岫青峩峩堂名不為游觀設標榜嚴公仰前哲令方
冰蘖事清修日企陳山思砥節世人慕貴不足論下馬
泣拜汾陽墳令今但望釣翁塚好尚與俗真猶薰往聞
范公當守睦嚴瀨奉祠初結屋至今壓水抗軒楹高栳
簷牙映喬木此堂徐侯能始基後來繼者知為誰堊丹

他日儻漫漶補理勿廢茲良規

歎旱 時年十八

我行田間歎且驚田間旱塊絲縱橫荆榛惡草亦枯瘠
雖有稷黍何由生田邊老人為予語欲語先愁淚如雨
老兒百指住山西世業農桑不工買年年此田收好穀
玉粒長腰春百斛公私取給有贏餘作飯為糜肥口腹
今年早種良辛苦抱甕澆畦寧入土困傾舊穀已無餘
新穀踈蕪復如許年年百指無憂畏今年百指俱憔悴

餓死填溝自不辭只愁逋負官家稅即今官稅催輸入
督吏臨門如火急老兒可是樂徵呼其奈黍頭無一粒
我感翁言情激烈却笑老翁言太拙為陳天子有深仁
子惠窮民念民切况今官府皆時賢會將租責都蠲捐
庶幾儉歲亦得飽且與爾曹圖醉眠

戲贈蜀僧清鑒

六言

西川有一鑒子非銅非鐵非鉛不假江心百鍊自然本
體精堅從來無臺可安瑩磨拂拭都捐歷歷森羅萬象

豈分形影姘旁人不敢窮窺照渠肝膽懸懸東來吳
越萬里依舊虛明湛然識者知為法寶不識酬之幾錢
泥塵埋沒不得光透三千大千

讀長門賦

阿嬌負恃顏姝好那知漢帝恩難保一朝秋水落芙蓉
幾歲長門閉春草自憐身世等前魚舊寵全移衛子夫
獨夜不眠香草枕東箱斜月上金鋪曉驚永巷車音近
失喜疑君枉瑤軫臨風望幸立多時却是輕雷聲隱隱

年年織女會牽牛百子池邊侍宴遊自從一落離宮後
無復穿針更上樓長記髻年聘時節愛深金屋寧衰歇
而今遽覺冷如冰不解向人佯暖熱愁看空樹集珍禽
孔翠追飛鸞鳳吟顧步深嚙生悵望伊誰一為迴天心
人言消渴臨卽客天下工文專大冊黃金取酒奉文君
願悟君王賜顏色賦成果得大家憐鳳觜煎膠續斷絃
不似昭君離漢土一生埋沒隔遙天

上李舍人

李侯半天霞絕俗幾千丈平生有勁氣傲岸力高尚波
濤驅筆底萬里一奔放清風凜鬚眉挺拔舍人樣蚤以
鴛鴦姿選羽邇天仗拖綬奉朝請論列專靡讓言辭劇
酸灼貶竄辱傷謗官資如馬走曾不興怙悵宴遊長笑
傲忠鯁期自諒江山窮賞目搜抉歸吟唱于今富篇章
態度難悉况精心極孤高麗雅略譁浪乘豪騁雄怪句
法時跌宕端如撫良琴杳默變清亮連篇時諷詠殫寢
每輒忘我慚語俗下有類牛鳴盎遽耳咸池音吟魂驚

沮喪聞之良匠氏侏儒非冗長醫師兼百藥馬勃用
或當微言出堂下挈手煩叔向儻許揖戈鋌願奉詩
壇將

送徐彥思倅建安

君不聞詩人一席眠
蔭窮夜泊建溪微月中猶能即事
慰岑寂隔簾朗詠看腫臃
今君笑擁簾篁去正有繁花
明驛路修程百越渺風烟發興自應多麗句知君蹕越
是名流朱紱聊煩佐上州貳政少安郎罷囷却登要路

贊皇猷西風獵獵搖征旆過往題詩振離袂武夷鶴膝
杖扶羸寄我他時訪松桂

擬李太白笑矣乎

笑矣乎笑矣乎交情貧富古已殊翟公底用門間書爾
真自爾我自我噫然將柰吾何如笑矣乎笑矣乎世人
那得相賢愚是非正用一理樞目光莫着牛背上但付
捧腹聊盧胡笑矣乎笑矣乎是生百歲猶遽廬勿謾辛
苦愁其軀丁年無事且須醉可待華髮傷頭顱笑矣乎

笑矣乎馮譙悲歌食無魚少陵老跨東家驢寧如三高
飽斫鱠坐嘯一舸凌煙湖笑矣乎笑矣乎相隨出關漢
兩疏散資千萬荀隱居彼皆棄置慕閑逸得閒何乃翻
區區君不見向來熱手勢莫俱側肩羹沸權門朱又不
見元家胡椒八百斛石家水碓三十區只今人骨久已
朽空餘古塚號寒狐

龍游吳宰因勸農過寓居

令君剖劇久推賢人謂賢如百里天最績已優恩已洽

訟堂無事日鳴絃

夙駕勤民力勸耕肯停車軌訪柴荆誰言羈旅知交態
君似春風不世情

阡陌東西馴雉鳴陌頭父老望前旌爭言字我今三歲
真是永清見底清

雲根仙館駐鳬飛倚閣遐觀笏挂頤但賞春山多勝事
不知桃李被恩私

龍遊王丞過寓居

邑丞族望邁平章謙槩能過白板扉應是德門流慶遠
清芬今復繼烏衣

能事知君不負丞况逢令長者賢聲同心坐了公家事
那肯空書紙尾名

君家丞相世豪英字畫文章不朽名盟手何時披墨妙
烏絲欄上看真行

王丞欲以其祖
荆公墨蹟相示

四月一日偶成三絕句奉勉諸友

麥風澹蕩氣清和又見陰陰夏木多試問社中同志士

經春學力竟如何

日正舒長好着鞭會須聞早暮高堅君看少壯荒嬉子
多向衰遲却諱年

讀書意緒戒荒蕪要使心清一事無過眼飛光流水急
莫矜頤頤始生鬚

送李國佐還三衢

昔人好與勝已處今世陋學多專愚惜哉計出栢馬下
徃徃自足令人吁子今年少且競爽徑拂歸袖真良圖

人言十步有茂草行矣求益無躊躇

送趙安伯縣丞之任婺源

邑丞清操如臞儒人言帝宗千里駒燃膏夜絕學更苦
下筆欲命騷為奴往年給札試西省堵牆學士紛驚呼
歸來汀草亂袍色上食日向庭闈趨君家先烈今誰如
江州黃州忠義俱綠林豪客為蒲伏刮腸洗胃投戈父
我方三歎揖盛事欲紀勁節慚才蕪君其努力濟世美
儻登要路須捐軀春流起施花芬敷取別草草如驚鳧

君逢後日南來客莫忘書札貽潛夫

凌霄花

栽松待成陰種漆擬作器人皆笑艱拙往往後得利君
看植凌霄百尺蔓柔翠新花鬱煌煌照日吐妍媚風霜
忽搖落大木亦彫瘁視爾託根生枯莖无殘蒂先榮疾
蕭瑟物理固難恃凌霄亟芳華衰歇亦容易

題武康唐伯南掃月軒

竹影掃秋月乃是仙人詩至今幽隱士想像沙塘陂開

軒嘯長風坐看山月吐修篁出清姿會作婆娑舞莫遣
兒輩覺此樂無人知誰家復多竹風月同幽期幸當語
竹知俗士久睽闕主人儻无嫌為掃石上月

寄題鄭亨仲可友亭

鄭君坐交窮結柳窮不去无朋長獨立老大荒村住荒
村掃人迹取友惟西山當應愛山標可望不可攀牽蘿
架風亭截薛揖高調修簷入危碧阮眼坐相照嗟今輕
薄子對面生九疑寧如友真山貞質終無移憐君意超

超愧我勞勿勿未共結交心漫負心脾骨

四睡次茂載兄韻

門外啼鴉暗柳濃華堂翠幕度香風流鶯不識夢魂遠

自向窓前訴落紅

春

水亭珍簾卧瑠璃日暮涼生小雨催誰刺蓮船過前渚

榜歌聲落枕邊來

夏

小牕卧冷聽吟蛩半擁輕衾乍怯風清夢不成空有恨

蕭騷踈雨打梧桐

秋

滿面風霜道上兒
箝銜口角甲生肌
幽人只有高眠興
雪擁柴門了不知

冬

暮春病起絕句二首

病起春深白晝閑
瓦松花老掩柴關
坐調心息無浮念
沉水烟銷古博山

老去長閑百不營
推書習靜更真清
西窓日脚籬篩動
時有飛蟲撲紙聲

浦江華藏寺如勝上人欲募施者開田佐僧供以

長老皎公書來求予詩作二十韻奉勉

浮圖謝朋親屏跡藏岩幽多規脫徭賦豈必皆禪流自
言佛遺經墾土為愆尤不耕徒穀腹何異鼠雀偷告之
勿浮食當須力鋤耨前修舉鋤事千載垂風猷奈何啞
羊僧百語不領頭皎公老禪伯雅慕吾孔周其徒有如
勝用意非常儔欲開千畦田更辨兩具牛率彼枯木衆
躬耕食其秋釋門有添丁乃翁坐無憂與國助耘耔
疲甿庶其瘳此志良足嘉感之歎綢繆昔聞白黑衆十

萬俱清修鳩金置千畝給供無時休于今豈無人勝也
當尋求長途觸隆冬一衲寒颼颼朱門立雪久歡喜無
生愁作詩勸勇往以俟歲晚收

郊行探春得梅林攀玩為樂因成詩示偕行

公不見白衣居士春風裏浪走尋芳南澗底要見深紅
躑躅花不辭辛苦行三里吾人風味復不惡異代幽情
敢相擬故穿密竹過山腰却下橫橋度沙觜寧甘著脚
踏殘雪正欲搜春訪桃李天寒桃李都未花只有山梅

破紅藥低欹岩石俯蒼翠倒影方塘照清泚臨風三嗅
忍迴頭細看長吟聊徙倚牽花及此當作意歸把踈香
泛浮蟻莫令標落亂飛空惆悵殘英隨隴水

次韻樓仲輝郎中游天王寺登城晚歸三絕句

燿燿城頭五丈旗萬人輦土事增陴念當拔白俱登守
恨乏驍雄濟一時

春來物色已爭妍梅柳低昂古道邊放步徑從蓮社去
逃禪要學飲中仙

歸路行吟慘夕風愁煩聊遣酒兵攻也知念國髭鬚白
不忘朝廷醉眼中

次韻姪端臣感興

日車走長天劫劫不容息坐令韶稚子面有凍梨色崎
嶇百年內貴賤俱物役獨往屬幽人膏肓嗜泉石伊予
真愛山所向留屐跡遙岑難歷腳望望憐寸碧阿卿昨
遠遊厭俗眼常白歸來對家山隨遇有餘適哦詩洗窮
愁感事念今昔婆娑碧溪上俛仰欣自得應嗤曩行路

萬事等兒劇相期從此始幽賞旦連夕

次韻婺守林懿成檢正游赤松絕句四首

寶積峰前露木香使君行旆照晴陽佳遊會自希高躅
可是空尋叱石羊

黃堂流化古風還夙駕勤民隴畝間已變呻吟作謠詠
山中那用覓還丹

紫煙仙客古祠堂青士蒼官屹道傍想見隼旟穿翠帳
有人迎路曉騎羊

殿邦政蹟茂棠陰着屐題詩寄意深應有高人陪皂蓋
烟蘿深處得幽尋

次韻端臣姪喜雨

初弦落微月草宇夜岑寂追涼拂桃笙伸欠聊偃息檐
榮忽飛雨散亂銀竹白避漏起移牀青燈暈空壁曉看
蛙入戶時有燕為石是節正驕陽歆燿火雲赤煩蒸等
坐甑百體勞按抑良苗憂槁暴空有庭樹碧借免抱龜
腸猶應困蔬色炎埃今一洗萬井沐甘澤望歲即交歡

寧容須暇隙相逢如得酒醕飲莫餘瀝

送別姚令聲刪定還諸暨

昔嗟九載一相見伊我與君俱賦詩只今又話十年別
襖被可辭同宿期相歡美酒如傾水我歌日暮驚風起
惜君抑塞抱奇才拳跼驂騑垂兩耳漢朝公卿忌賈生
世路古已悲難行如君不入中興用脫帽置酒來耦耕
君馬欲東還語別細雨黃花正愁絕一尊不更苦留君
後日空嗟共明月

示姪

華顛老學似秉燭及壯貴在勤書詩男兒不解事文筆
何異婦女留鬚眉予生早已度弱冠畋漁藉素常嗟遲
爾今年纔十八九着力鑽礪誠當時胡為講道率麁滅
浪自閑散多盤嬉或時使酒昧檢束怒罵臧獲驚紛披
我旁聞爾作氣勢憐爾放鷺如癡兒人生稟受性不惡
輕馭要使知高低常時見爾亦遜順頃以狂藥生尤違
便當懲父悼往失痛戒濡首踈尊庖專心蓄力玩經笥

調護氣術循繩規吾言一日可三復勿謂浪語無資裨

示友

忍過事堪喜斯言良不欺當須去鉗忌佩服西門韋君
看朋徒間契闊多睽離胡不事久要有酒歡樂之顧於
毛髮輕溢惡相嗔嗤平生結情好一旦成乖違譏呵起
交攻醜語剥面皮空貽兩不快呀喘如筒吹吾聞西山
翁棄惡怨用希男子固高氣何以睚眦為請君謝犬尾
脫略除嫌疑自然鄰曲交耐久歡相持儻復不自慰君

當讀吾詩

送張子經撫幹還臨安幕

一昨睽離五換年相逢道舊各欣然已陪文酒四百刻
更得車斜二十篇君家閣老名能賦蓬萊扈遊方遇主
吞曹奪李杜陵翁句律從來付宗武如君才藻信踰人
着帽猶為入幕賓別去當須自珍寵行看策足出風塵

送葉彥益縣丞之任江寧

君不聞赤縣詩人書案牘兩衙苦被官拘束自嫌不辨

世間忙猶得吟看縣牆綠今君器度鼎函牛爲承烹鮮
餘地優更當淶水吳京邑豪士新亭舊勝遊去追禮樂
群英盛豈復區區勞貳令兩株松下日長哦會有劉郎
互題詠能來取別思依然爲我津頭一繫船解手看君
有知己吹噓高翮上青天

對酒分和杜詩

桃花朱李花白高柳花邊出多碧雨中物色更芳鮮
未礙劉郎中一石醺酣裁詩角險麗坐人豪逸俱勍敵

但令得醉復長吟山雲從爾生虛壁

遊赤松觀

靈祠丹井餘真跡祠下老松森百尺
仙子騎鯨去不歸癡人猶問山中石

次韻茂通弟立春四首

物華俱入發生辰喜見花梢刺眼新
便好銜盃嚼紅藥不須枝上火燒春

青青覆雉麥畦肥柳線輕黃拂面垂
擬贈物華无麗句

徒慚口業未拋詩

春生稚戲我難同聊復題詩傍紫紅忽得池塘夢中語
知君句律有新功

富人百屋看錢堆不省東風幾日來報答春光須我輩
要當劇飲縱歡咍

贈清鑒上人

川勤直下生馬駒早追奔電越國都至今不肯著槽廐
蹴蹋萬里浮江湖我來古寺長松下邂逅解包逢磊砢

尚看秀色帶峨眉，墨玉貫珠常在把。
問今客路迷風沙，得无勞苦行天涯。
笑言煩惱真佛事，去家千里猶吾家。
休公昔生我鄉曲，一畊得得遊西蜀。
鑒今却自蜀中來，好住蘭陰結茅屋。

寄題趙叔才秀芝堂

君不見邯鄲邑令昔好奇，強指金燈花作芝。
得非美瑞世罕見，遂假凡草相謾欺。
君家聞有真三秀，近出高楹照簷雷。
不須仙客費耘鋤，協氣蒸成自榮茂。
信知為善

來嘉祥得此上藥扶年長庭階令子映蘭玉要使如芝
冠衆芳

苦寒行

君不見詩人著布裘願得大裘一萬里又不見詩人歎
茅屋願得廣厦千萬間重堂複宇御狐白今世誰念人
多寒我衣穿空垂百結蓬蘿蓋頭四壁裂衣却顧悲號窮
獨人露宿牛衣冷如鐵

淒涼行

君不見神羊觸邪世不省舞馬應節披華衣又不見屈軼指佞沒空草合歡蠲忿生庭墀勲華一去幾千載神羊屈軼令人悲二物不可見我悲何日忘喧啾聞反古炎夏亦淒涼

三月二十六日夜同端臣端杲姪觀異書效李長

古體

楊花亂落青春暮燕拂簾旌傍人語縹壺買酒洗春愁迴風落日簷花舞赫蹠斷爛千載書青燈照字驚蟬魚

冬烘老生時自哂安用盤盂學田蚡

四月十六日同弟姪效李長吉體分韻得首字

黃梅雨歇春歸後
搏黍哺雛鳩喚婦
紅殘小頰蹊上花
翠刷濃眉陌頭柳
籜痕半脫烟篁瘦
露裊幽香逗書牖
雲容漠漠曉陰愁
麥信風前一搔首

偶作二首

晏食聊當肉緩步聊當車
身閑貴莫比心足富有餘
時飲一盃酒歷觀千載書
正爾良獨難亦復將何須

飛花拂簾幌亦有關籬牆隨風各偶爾何足較短長富貴真傳舍易人豈其常寄語窮巷士少安无自傷

狂泉

昔有大荒國水以狂泉名國人皆飲泉狂顛率無寧一者自穿汲乃獨能常醒國人既皆狂反見不狂驚顧謂不狂人無乃鬼物憑不然是狂疾救療當痊輕施針灼炷艾膚肉無全平而彼不狂者被虐楚不勝賁然走泉所酌飲不敢停既飲即亦狂萬慮皆迷冥其狂與衆一

衆始歡相傾世事今亦然嗟哉感詩鳴安得跨鵬背獨
往遊天溟寄謝彼狂子酌泉吾不能

次韻茂求兄論有無之作

磨甗不成鏡畫餅不可食談空如畫餅要匪實消息泥
有如磨甗未免見排闥籌量有無中背道費尋覓先天
為心祖此事冥太易空母墮渺茫有勿著聲色勿同半
生滅邪見徒役役萬有齊一虛寥廓烏無跡至虛本非
無豈謂滯神識佳哉僧肇論妙意真的

僧肇云齊萬有故虛曉至

虛之
非无

己巳十二月二十九日同端臣端杲姪觀王右軍

帖并晉書以白藕薦酒成詩

星回景急歲聿除更長燭明坐蓬廬東風夜半欲入律
萬木先已爭號呼小阮過予足風味共觀古帖披前
志秋蛇縮字右軍書朔馬騰風東晉記紛紜萬古浩無
涯且啖白藕傾流霞分甘恨不如船太空想峰頭十丈
花

香溪集卷三

欽定四庫全書

香溪集卷四

宋 范浚 撰

詩

池上晚酌

題雙清堂

陶潛詠

次韻茂永兄首夏新晴

題茂安兄藏春園

題茂安兄秀野亭

次韻茂通弟晚晴

歲暮喜晴

初冬郊行

遊嚴州景德寺

雨後出郊二首

登富陽觀山亭

張子經示所得後湖居士詩及書札想見其人

寄意短韻

次韻端臣姪晚行南溪

課畦丁灌園

春望二首

讀孔北海傳

春雪晚晴出西村

送周西美主簿之任祁門

次韻陳叔永山居二首

西園

戲效白傅體送姚刪定

避盜泊舟武康遠光亭下與同行分和杜工部

詩傷秋及宿江邊閣二首

遊南山晚歸二首

賀茂寬兄賜緋

李修撰哀挽二首

冬日行蘭溪道中六言二首

忘言示曾仲思

春日行蘭溪道中六言

次韻茂通弟郊行見梅

次韻端臣姪七夕

贈光上人

張生夜載酒相遇

幽居

寓龍丘次韻茂永兄見寄

端旻姪示遊花藏寺詩且道皎老相問意因次

韻併煩為簡皎公禪師

次韻茂載兄偶成二首

送歐丈朝請赴闕

春飲分章字韻

次韻富修仲見贈二首

過嚴州烏龍嶺

次韻翁承之見寄二首

懷宗臣併寄

次韻伯通姪歲暮卽事

悼致政樓少師

寓居蘭溪地濕卧病

次韻端臣姪同遊藏春園

次韻端方姪喜雪兼簡端臣姪發一笑

送王大聲

茂載燕兄弟預者六友宜盡觴詠之樂茂寬兄

有詩因次其韻

池上晚酌

雨餘池上興悠哉，坐蔭藤花藉石苔。
白鳥聯拳相對立，紅蕖粲艷一時開。
吐吞月色雲濃淡，經緯水紋風去來。
幽事相關心自樂，岸巾獨嘯更銜盃。

題雙清堂

市合喧卑外，堂開磊落明。
大山橫面勢，積水帶潭澄。
野靜，謹蛙斷林幽。
獨鳥鳴杜陵，詩句在心跡。
喜雙清。

陶潛詠

五箇門前柳千年身後名掛冠真避俗自祭頗忘情且
進杯中物何勞絃上聲詩篇經李杜猶得擅精清

次韻茂永兄首夏新晴

燕落雨知節鳩鳴天欲晴行雲飛斷碧斜日漏微明
上竹三徑苗肥田一成野人知得飽索酒坐班荆

題茂安兄藏春園

春入名園何處尋

劉禹錫春有情篇
云春情何處尋

東風引步上岷嶽

平凝四面雲嵐合曲折一邱花木深碧草華滋迷絕徑
綠蘿陰影護芳林韶光向此知歸處長與先生共醉吟
題茂安兄秀野亭

山作屏風雲作籬蒼堯亭子俯漣漪絕知此地風光好
直為主人心跡奇側塞亂花紅被徑檀欒高竹翠緣陂
惠連自喜陪幽賞判却歸時倒接籬

次韻茂通弟晚晴

浮雲捲盡綺霞明藜杖扶行得晚晴斜日水邊鷗鵲影

孤烟林外鵲鳩聲且從樂處安心地可向艱時觸志兵
幽意欲言言不得因君聊復動詩情

歲暮喜晴

晴山喜見曉嶺岼笑出蓬門不暇冠風掃斷雲齊萬弩
日融殘雪上三竿早黃楊柳漏春信晚翠枇杷凌歲寒
從此林芳入幽賞凍醪新壓味甘酸

初冬郊行

空濶野雲疎行行思鬱紆露花啼晚菊風葉舞高梧日

落牛羊下天寒鴈鷺呼却回南澗路暝色擁蓬廬

遊嚴州景德寺

出郭雨初霽到山雲欲無老松看偃蹇幽徑上崎嶇佛
屋藏巖曲天花舞坐隅向來愁絕意此地一醒蘓

雨後出郊二首

晴景收林靄春郊賸物華麴塵官道柳粉艷野塲花竹
裏草亭古沙邊苔徑邪遣心知有處發興渺無涯

扶輿穿密竹度約過前溪靄色烟橫野春聲水繞畦映

山行白鷺還木韻黃鸝客裏貪幽事歸時日已西

登富陽觀山亭

弭棹依寒渚臨亭俯碧川
嘶雲征海鴈椎鼓過風舡
水濶天低樹山空日暝煙
擬題江似練終愧謝公賢

張子經示所得後湖居士詩及書札想見其人寄
意短韻

後湖翰墨真追古前輩風流獨到今
二月書題看六紙一篇詩律抵千金
周郎酒裏君相得韋九花間我欲尋

飯顆山頭如遇會殷勤為道仰高心

次韻端臣姪晚行南溪

幽草轉溪路瘦藤扶我行條魚知有樂鷗鳥共忘情
嶺翠望中色輟輟何處聲賞心成朗詠巢鶴不須驚

課畦丁灌園

連筒隔竹度流泉約束畦丁灌小園拔薤自須還種白
刈葵輒莫苦傷根瓜疇准擬狸頭大草徑隄防馬齒繁
努力荷鋤當給酒無令菜把乏朝昏

春望二首

岑樓占樂園高檻俯平原野秀風烟合春深草木繁晴
山明歷歷遠水去渾渾興出青冥外心隨獨鶴翻
眺聽不知暮徘徊聊復吟歸雲迷近谷去鳥度前林長
日憑高目傷春望遠心邊方殺氣在天北慘沉陰

讀孔北海傳

歎息東京亂忠推北海豪未容未女鬼輒代殂金刀義
槩秋霜勁英名白日高猶應凜生氣遺恨失吞曹

春雪晚晴出西村

步履尋春犯雪泥
村南村北鷓鴣啼
墮梅殘白猶明樹
著柳暗黃初映堤
風景快晴雲擘絮
江天未暮日懸規
最憐碧漲侵沙尾
更傍橫橋一杖藜

送周西美主簿之任祁門

君向祁山去修程
幾日期江天梅子雨
驛路橘花時知
迫循陔養寧辭糾
邑卑美才無不適
鸞駟豈棲遲

次韻陳叔永山居二首

聞君結屋廬幽意枕山隅
剝竹開三徑栽桃課百株
眼

根長寂寥

厯音

心地不崎嶇試問新詩句
能窮勝事無

子方誇小隱我亦愛深居
出補登山屐歸携帶月鋤
旋沽新漉酒聊駐故人車
有此幽棲樂雖貧亦晏如

西園

路入西園繞綠苔
我來倚杖一徘徊
霜林有樹葉皆落
風榭無人花自開
奴橘甘酸千百顆
侯梅蕭灑兩三栽
幽人自是便幽勝
終日孤吟只費才

戲效白傅體送姚刪定

倦客長年嗟久客
交遊此地喜偕遊
後溪水接前溪碧
小響峯連大響幽
千里家山千里夢
一春風月一春愁
今朝共話明朝別
取醉君無不醉休

避盜泊舟武康遠光亭下與同行分和杜工部詩
傷秋及宿江邊閣二首

帶郭人烟少
通村徑路微
水光浮棟宇
野色動窗扉
小樹無重數
前山不合圍
艱危鄰虎窟
奔迫詭牛衣
白舫

竟何適丹楓看即稀西園小茅屋知復幾時歸

客子舟維岸人家樹作門西風秋慘切南鵲夜飛翻惻惻驚心折鞵鞵戍鼓喧若為容足地廣大自乾坤

遊南山晚歸二首

樂事愜幽討閑情便舊遊梳風修竹晚掛日老楓秋一飽桑門飯百忘塵世憂蕭條茅屋下可以縱冥搜

荒荒日已暮迴首興何長耙耜紛乾穢森疎嘯折筮水枯山石露風晚野花香歸卧前簷下詩成小雨涼

賀茂寬兄賜緋

褒功傳紫詔賜服下丹墀
朱紱榮書記銀章付拾遺
鳥
鳬隨步趾象笏映鬚眉
更卜垂三組它年佩陸離

李修撰哀挽二首

三朝推舊德四海仰高名
起起方驚夢嗟嗟忽奠楹
木
氷傷達宦薤露寄哀情
矯首西山下懸河淚已傾
公欲攀琪樹天令墮玉棺
生前紆白艾身後跨青鸞
今
子清規在遺書舊墨乾
英靈今已逝千古一長嘆

冬日行蘭溪道中六言二首

雲頑欲雪不雪梅凍將花未花荒草狹蹊山路斷橋流水人家

瑟縮鷗栖古樹聯拳鷺立回塘水際風低白葦隔村時見牛羊

忘言示曾仲思

范叔初非辯士曾子本同道人歡伯解兩家難忘言一笑相親

春日行蘭溪道中六言

遠草連雲碧積繁
花照日紅酣信馬
貪看春意不知錯
過村南

次韻茂通弟郊行見梅

好風催冷蘂上番
即芳葩春色獨先得
年芳誰復加日
邊看暖豔雪後識
真花吟翫歸來晚
江村月照沙

次韻端臣姪七夕

萬古東西隔女牛
停梭期會豈悠悠
蝦蟇蟄輪破青天
暮

烏鵲橋橫碧漢秋，莫放癡兒懽徹曙。且容老子強登樓，
舉瓢更取天漿酌。一洗胸中萬斛愁。

贈光上人

道人工小筆，梅瘦竹嬋娟。更學有聲畫，不叅無眼禪。一

枰聊復爾，七馬獨超然。為足前年句，真成續斷弦。

上人往者

訪予出示李伯時所畫七馬，仍求予詩嘗坐上口占六句，今復來求足前篇，因續成四韻，故云。

張生夜載酒相過

夜卷一鉤簾，衣寒覺露霑。未驚風割面，且看月磨鎌。玉

梳鵝兒酒花甌虎子鹽張公鷄黍舊歡笑了無嫌

幽居

幽居長杜戶竟日少來人花動蜂兒去簾垂燕子嗔脫
巾幘不整得酒醉仍頻養拙風塵外吾寧愧此身

寓龍丘次韻茂永兄見寄

夢想常懷兄弟賢何如合眼到東川客居自幸貧無事
歸計猶須大有年一丈席間方隔濶萬金書意要頻傳
詩筒更喜如飛鳥願乞去聲清新一百篇

端旻姪示遊花藏寺詩且道皎老相問意因次韻

併煩為簡皎公禪師

子到祇陀舍經行幾屐穿想當吟出月不奈思如泉真
界飛花雨寒山落木天皎公知好在香室夜安禪

次韻茂載兄偶成二首

自笑趺趺走海邊樓遲已與俗相捐誰憐乞米問盧老
懶以無薪告仲連案上三盃朝不飽膝頭一榻夜驚穿
詩人未用生羞澁尚覺囊中有一錢

君看如絃死道邊由來忠鯁世人捐
劒除佞士朱狂直笏擊姦臣
顧少連莫以古人蘄薄俗空嗟膏軸運
方穿齒牙枉挿於菟口見說官家廢料錢

送歐丈朝請赴闕

祖道春風外傷懷野水濱
親盟丈人行才力棟梁臣
好去鞭高足榮期據要津
人言宣室召未棄賈生貧

春飲分章字韻

傳盃行美釀擊鉢課名章
月借金窗白花分小樹
香人

情歡不盡道
銜醉相忘鷄黍襟期厚
休論漢范張

次韻富修仲見贈二首

故人欣面歎
令我得眉伸
意有千金重
詩無一字陳
清規看後裔
賢業想前人
會續安邊策
何當謁紫宸

幽棲長懶放
野性恥浮沈
避俗真成僻
居山恨不深
感君來辱意
契我願交心
但愧瓊瑤贈
才枯欲嗣音

過嚴州烏龍嶺

何年龍脅破
鱗皴應是風
雷役鬼神
曲折鑿開南北路

去來老盡利名人秦雲楚樹青天外禹穴胥山滄海濱
下視叢城如掌大市聲啾唧暗紅塵

次韻翁承之見寄二首

人情巖險摧車路世事變遷鳴屐廊自分北宮長糲食
懶從東壁借餘光林廬雪後梅含白籬落天寒橘孕黃
幽意只應君共醉何時拂石對傾觴

伊我索居吟雪屋懷君獨夜步風廊語離尚憶三春暮
共醉曾分一日光忽喜斜封書絹白更傳妙語色絲黃

遙知發興虬松下白眼看天自舉觴

懷曹宗臣併寄

閉關自喜脫愁籠未愧柴桑避俗翁
黃妳引人千里夢青奴借我一窗風
綠葵紫蓼園蔬課白葛朱藤野步供
尚想故人懷別久論文安得一罇同

次韻伯通姪歲暮卽事

世情分付與東流含梗徒勞百念浮
但使心源長寡欲便知樂地本無憂
處身忌作燕巢幕脫事要如鷹掣韉

節臘好同營一醉幸逢開泰戢戈矛

悼致政樓少師

雅望題輿早已賢高風晚歲更超然
笑收劒佩遺榮路獨往山林事引年
行馬正看光梓里卧麟忽嘆掩松阡
鄉州耆舊今垂盡忍見山顏重涕漣

身後儲休世或同生前有耀孰踰公
斑衣五采樞臣貴寶帶萬釘天眷隆
終始哀榮時共羨丕揚寵贈會追崇
遙瞻素旆愁雲外慘愴悲歌立晚風

寓居蘭溪地濕卧病

病怯簾疎雨到床雨餘山靄上衣裳宵攜冷杖強看月
曉傍暖簷貪向陽禦濕要須謀日飲乏資深恨值年荒
所須藥物真吾事麥麴山鞠音今滿囊

次韻端臣姪同遊藏春園

探春着屐犯榛荒更入名園轉曲塘紅認蔬畦憐小甲
白尋梅援得幽香全同花下迷山簡只欠池頭語葛強
吾土信多行樂地絕勝酒裏到家鄉

金匱要略卷四
次韻端方姪喜雪兼簡端臣姪發一笑

川原恍若白崖天，屑玉輕明瑞有年。
折竹掀轟宵暗積，欺梅豔溢曉相鮮。
當知破耳衝風出，未似蒙頭正晝眠。
杲日能憐有貧者，不須更作寄天牋。

送王大聲

腹藁才名第一流，只今偃蹇困吳州。
牛腰但使詩章富，鶴髮寧論歲月遒。
耻傍朱門隨掉尾，獨尋青筇釣查頭。
知君高勝如松竹，不遇猶為蕭洒侯。

茂載兄燕兄弟預者六友宜盡觴詠之樂茂寬兄
有詩因次其韻

南北東西遇合疎偶然良會足歡娛
豹胎供饌斥魚婢
雀舌試湯分酪奴
花萼成詩多共賦
竹根有酒不須沽
借令六逸無人畫也勝當年九老圖

寬兄有寫作蘭汀
六鴈圖之句故云

香溪集卷四

欽定四庫全書

香溪集卷五

宋 范浚 撰

雜著

讀老子

讀管子

讀周禮

讀曾子

讀鄧析子

對秦問

鐵工問

泉志

馬喻

舜蹠圖

心箴

耳目箴

續丹宸六箴

進學齋銘

愚齋銘

讀老子

萬類莫不共由謂之道在我得之謂之德仁也義也禮也智也皆得之在我者也故四者異名總而名之曰道若所謂立人之道曰仁與義之類是也亦總而名之曰德若所謂君子行此四德之類是也然則在我得此道矣以止而覺焉者言之則謂之仁以履行而言之則謂

之禮以行得其宜而言之則謂之義以知仁義禮之用而察焉者言之則謂之智是特其名異耳豈道與德有二哉豈仁義禮智與道德為六哉仁之覺智之知亦非二也智之知知之用也仁之覺無知之體而為言也禮也義也智也雖不可謂之仁而仁之覺無不在焉猶元氣之發生謂之春也夏也秋也冬也雖不可謂之春而元氣未嘗不行乎其中物雖彫落於秋終藏於冬而發生之性未嘗不存焉此易所以謂仁為元也然則道德

仁義禮智初非有二也老氏之書乃曰先道而後德先德而後仁先仁而後義先義而後禮是豈誠老聃之言乎且以老聃譬之以其姓稱之則曰李氏名稱之則曰耳字稱之則曰伯陽諡稱之則曰老聃然其人實一人耳謂李耳與伯陽為二人可乎謂先李耳而後為伯陽先伯陽而後為聃可乎使老聃誠知道則是言非其言也豈後人附益之辭耶昔者曾子言孝而曰仁者仁此者也禮者履此者也義者宜此者也孟子言仁義而曰

智之實知斯二者弗去是也禮之實節文斯二者是也
以參與軻之言求之仁義禮智初非有二謂先仁而後
義先義而後禮奚可哉學者讀老書宜慎所擇

讀管子

東周無齊侯東周當如何曰周不國矣齊侯無管仲齊
侯當如何曰將不得與於諸侯之盟管仲相齊侯九合
一正為霸雄長威攘夷狄微斯人得不被髮而左其袵
是仲之功與稷植耒教相上下或曰仲不能王其君而

區區佐以霸道故孔子稱其小器蓋不其然齊侯霸則
周苟存齊侯王則周必亡齊不亡周句復焉得王王則
周必亡矣管仲俾其君尊周者也方俾其君尊周又焉
得王其君乎天王使宰孔致胙於齊侯命毋下拜齊侯
遂欲不下拜而謀於管仲仲進不臣之戒而公猶以三
代受命異同為問仲因詭以三祥要之公因懼而下拜
恐隕越于地是仲俾其君尊周者也仲痛蒼姬無令王
可輔以興東周姑即齊侯而翼戴之使文武不至不祀

責不王其君可乎孔子薄仲之三歸反玷以為不先自治故曰小器已而美其功則又曰民到於今受其賜是非無取乎仲也仲言強國安民至矣人君苟即其書擇可用用之猶足以致一正九合之盛秦漢而下未聞有致君若仲之相齊者而乃高為虛言陋仲不王其君何謂哉

讀周禮

周公作六典謂之周禮至於六官之屬瑣細悉備疑其

不盡為古書也周公驅猛獸謂蟲蛇惡物為民物害者而蠃氏云掌去鼃黽焚牡蘗以灰洒之則死鼃黽不過鳴聲聒人初不為民物害也乃毒死之似非君子所以愛物者又牡蘗焚灰大類狡獪戲術豈所以為經乎司關云凡貨不出於關者舉其貨罰其人說者謂不出於關從私道出避稅者則沒其財而撻其人此決非周公法也文王治岐關市譏而不征周公相成王去文王未遠縱不能不征使凡貨之出於關者征之足矣何至如

叔季世設為避稅法沒其貨撻其人劫天下之商必使從關出哉此必漢世刻斂之臣如桑羊輩欲興權利故附益是說於周禮託吾周公以要說其君耳不然亦何異賤丈夫登龍斷而罔市利其為周公何如哉

讀曾子

世傳曾參書述孝悌仁義陰陽之說甚著雖不皆底於道要與齊魯論孔子家語禮記等書言相出入亦宏揚姬孔之一助也班生志儒家書有曾子十八篇今其存

者十篇而已不知餘八篇為何等語而脫亡於何時隋書錄曾子兩卷與今本同意其亡於魏晉之間也

讀鄧析子

劉向校除鄧析中外書定為二篇其言大抵根於刑名蔓於老嚴而茨棘蕪於聖道謂堯舜為不厚子謂周公為不厚弟謂左右結舌為明主謂委任臣下為亡國謂盜跖不可禁為聖人之罪邪誣橫異律之王制可逃誅乎向令駟歃殺析并竹刑而燔滅之則距詖放淫之功

與辭闕等矣效尤遵繆是為子然之譏方之甘棠豈其
倫乎

對秦問

或問秦始皇帝焚詩書以愚天下天下其可愚乎對曰
天下不可愚也始皇之愚天下是自愚也愚其子也非
愚天下也其焚詩書非焚詩書也焚其國也使始皇既
焚詩書矣則今六籍非詩書乎彼散為寒灰者特枯竹
耳至若經之所以為經固有不因簡策而存者矣況夫

出於屋壁傳於老生雜出於名山神物之所守護固自若也其有為秦焚亡者幾何語哉詩書既焚矣而秦之紀綱日以隳敗天下豪俊圜睨並起皆知擬神器逐華麗其有為焚書而愚者幾何人哉詩書不可焚也始皇焚之天下不可愚也始皇愚之徒使帝王之道不漸諸心仁義之言不歷諸耳計能遠築長城以捍邊鄙而不知荆卿匕首接於肘腋博浪之椎近起於屬車之下是非自愚乎始皇既沒胡亥嗣世自幽深宮不分馬鹿之

異閭樂之禍已侵肌骨而猶不自知是非愚其子乎亥
之愚趙高刼之高之姦子嬰誅之秦君秦臣內相吞噬
而國隨以亡雖有咸陽宮室曾不足以供楚人三月之
火是非焚其國乎自愚其身又愚其子又焚其國此始
皇所以取譏萬世而不已也天下其何愚之有哉問者
悚然悟听然言曰子言然吾今乃知天下之不可愚又
知詩書之不為秦焚亡矣

鐵工問

丁未年作

予居香溪一日過旁聚落有鐵之工家窶甚視其廬蓬
茨穿漏隘不踰五十弓僅竈而牀焉工手鑄而冶妻燎
茅竹以爨試染指其釜則淡無醃醢特水與覓藿沸相
泣也一稚兒卧門旁嗚嗚然若啼飢其人皆黧鰲疲曳
殆鬼而生者予憫然嘆曰人之貧有至此極邪解囊中
錢千乞之工叩頭佩謝如得兼金又五年再至其處則高
墉華屋朱牖戶而藍櫺楣予怪之以為工之蓬茨移他
人矣問諸其鄰曰猶工居也予益怪之歛門而見工則

充然其形博頤大腹被服鮮好拜揖如禮度延予升堂
羅肴陳觴如多錢翁昔之鬻茅竹者今釧纏臂釵挿髮
矣昔之啼門旁者今結帶裹頭厭梨栗矣予愈益怪之
問工何遽潤屋及此工曰小人荷惠者也敢不以實告
小人貧時無以自業恃炭鑊為命而世久無事所鍛冶
必農器適歲荐饑農不得利率逋畝去為末業耕者日
益落吾為犁鋤鋤窮一日力僅得一器輒一月十五
日不售故甚窶如昔時已而天下兵興戈戟載路人欲

挾利刃家欲藏銛鋒以刀劒鏃鏑來謁者日填吾門吾
昏曉事鑪鉞不得休未半歲而有此屋既一歲而生生
之資大裕今得擁裘纊安坐而飽吾腹無餘憂矣實小
人之幸予聞工言面而去之蹙然曰嘻工之幸齊人其
真不幸哉

泉志

距吾廬南不能五十步有泉激激出石竇間色乳味飴
與他泉不類因坎竇下鍾其源以供家奴旦暮料挹且

醴溢流而渠之與里人同其甘鄰曲來汲日數百器泉
之供哆常自如雖歲甚旱焦川枯壑而泉不知也渠之
汎濫而走音奏下者與南澗合流以西亂於香溪汨汨窮

晝夜吾知其不至海不已也夫泉之甘而利人也類有
德其不涸也類有本其趨澗溪而期於海也類有志人
之育德有本能日進而期於道則其淵深闊大也必矣
吾於泉有感於是乎志

馬喻

吳人習水而便舟不熟銜轡事雖畜馬無能名其駕若
駿也有得千里驥者繫之厩秣與下乘等驥固不羣騰
跳槽櫪有追風籊雲意主人瞠其氣之逸也而寧之他
日御以適廣野試加策焉驥久曲跼不自快得騁則半
漢而疾馳又輒要駕奔蹏

徒計切

主人益以為寧市諸市

而微取直焉更得凡馬以歸頑筋弱骨短脅薄髀而償
資五倍於驥效之途則小步緩出鈍不得前主人顧喜
曰此真名馬哉飽以穀粟終其生范子曰士有庸衆驚

散者皆能餉珍甘斥厭餘以恭妻子而世又貴之則主人之凡馬也至邁往士意象豪逸與世俗相齟齬人每賤視之往往側偏長貧草萊不給其不為主人之驥者幾希可嘆也

舜蹠圖

心善
利
舜問念狂
蹠克念聖

孟子曰雞鳴而起孳孳為善者舜之徒也雞鳴而起孳孳為利者蹠之徒也欲知舜與蹠之分無他利與善之間也夫善利之念間不容髮一髮之差遂分舜蹠學者

可不戒且懼哉利不必謂貨利凡有利心皆利也今有人焉修身慎行服膺天爵而不倦勤亦至矣然而其心若曰吾將以是有要焉是為利非為善也必其設心措意惟以自治而不求乎在外然後可以謂之為善然則世之孜孜為善者豈易得哉此所以為舜之徒也孔子曰輕絕貧賤而重絕富貴則好賢不堅而惡惡不著人雖曰不利吾不信也孟子曰枉尺而直尋者以利言也如以利則枉尋直尺而利亦可為與蓋聖賢之所謂者

其凡例如此予故發孟子之意為舜跖圖謂夫善利之念起于心者其始甚微而其得失之相去也若九地之下與重天之顛又以謂雖舜也一罔念而狂雖跖也一克念而聖舜去狂遠矣在一罔念間與狂同失跖去聖亦遠矣在一克念間與聖同體人能於危微之際而得之則亦幾矣嗚呼孳孳為善所以熟吾仁也苟為善而一罔念則非孟子所謂孳孳者為利之心殆將乘間而起矣故又以克念罔念之說繫于舜跖好學之士必有

能知予之心者

心箴

茫茫堪與俯仰無垠人生兩間眇然有身是身之微太
倉稊米參為三才曰惟心耳往古來今孰無是心心為
形役乃獸乃禽惟口耳目手足動靜投間抵隙為厥心
病一心之微衆欲攻之其與存者嗚呼幾希君子存誠
克念克敬天君泰然百體從令

耳目箴

他耳則耳他目則目世儒之學因人碌碌聾盲於心聞
見淺俗我目吾目我耳吾耳中人之學聞見由已緣於
視聽微之燭理不目而見不耳而聞上知之學德性是
尊無視無聽昭然者存

續丹宸六箴

并序

唐李衛公作丹宸六箴獻於寶厯天子分章措意雖已
篤忠而辭乏剴切或未能竭盡規儆輒不自愚猥繼其
說極人臣所甚忠而難乎言者以發衛公之諷指亦古

人象歲之義也作續丹扆六歲

宵衣箴

高高者天昏昕靡忒宵終則明人用不惑惟辟奉天視
朝以明宵向終矣君當遂興宵終不明天謂失度宵終
不興君胡不懼鷄人既詔叫庭燎既輝鸞聲將矣敢告
綴衣

正服箴

紂曳玉衣焚身之招靈紆估服為服之妖冕兮袞兮夫

豈不美靈胡為異紂胡為侈服侈服異商亡漢顛何如
伊祁垂裳百年齊官十笥視古已縟踰斯益愆敢告三
服

罷獻箴

配天立極家是九圍一絲一粟王田王機惟王畀民什
一是私既私什一餘則不有臣何獻為作君貪醜杯犀
筋象君庖不充輕縑細罽補袞無庸焚裘却蛤堯禹齊
風

納誨箴

臣言廟上取喻批逆小斥大誅臣身何益臣匪干利君
奚弗思凡厥鯁言君其聽之愼諫違人君實自暴人亦
有言永矢弗告

辨邪箴

謂犬似獬謂獬似狙謂狙似人犬斯人如正視犬人人
實殊遠不推類似犬自為犬姦邪亂正猶犬人疑知人
則哲辨似而非灼彼似非真贗兩定邪姦既明亦克用

正

防微箴

紹終危齊莽卒篡漢惟微弗防以及甚亂勿云何害狎
彼濫觴盈科泌濫滔天作殃紹以熏身齊視猶戲莽憑
國威漢用弗忌流蛆啜鵠臣子攸諱觸瑟薦魚是真細
事

進學齋銘

今人之學吾不能知古人之學庶乎可窺進學之義古


人與稽嗚呼今人殊於古者習相懸也不古不今者心之所同然也今之學者期乎人古之學者成乎天也古人遠矣獨聞而知之者得其傳也吾求諸天地天地有不言之教吾求諸萬物萬物有不言之益吾求諸人有善不善無非吾師吾求諸身目視耳聽手執足行動息言為無非物則吾求諸心萬理咸脩默焉而可得吾求諸性性吾天也天可學乎性不自性能無學乎古之人進乎進知至至之止乎止知終終之不進不止不止不能

不進宜吾勤斯進而止則無進無學矣且尚何為嗚呼
力吾進所以妄企乎古人也猶有進焉是吾有媿乎古
人也思進以求止庶或有至乎古人也一斐浮空衆微
從之成一拳石廣大之基其積不已邱山巍巍有見乎
此則歸然崇成者初已形乎一斐之微進學之義於焉
可推嗚呼安得知幾之士而告之哉

愚齋銘

吾弟茂清築便室而名之曰愚浚為之銘以戒坐隅曰

人初生性稟一區惟所習之則智則愚稽彼古人夫豈
子殊厥有過人則不可誣古人之同飲食以居古人之
異執德不渝子其戒之無迷厥初昔者子淵愚於道朱
穆愚於書狄山愚於忠淳于越愚於儒北山為愚公西
山為愚夫子其所謂愚者豈志是歟不然則昧菽麥迷
魯魚守錢而金其穴堅門而鐵其樞靜焉釋耕而守株動
焉觸太行而敗其車是皆今世人所謂真愚者也子其
戒之無迷厥初



香溪集卷五